


# RM1.5 trilion wakaf belum diteroka

**Kuala Lumpur:** Sistem wakaf di Malaysia memerlukan satu inovasi bagi menarik dan menggalakkan umat Islam berwakaf berikutan dianggarkan terdapat hampir RM1.5 trilion wakaf yang belum diteroka berdasarkan kajian dibuat dua tahun lalu.

Pengarah Pusat Pengurusan Wakaf, Zakat dan Endowmen (WAZAN) Universiti Putra Malaysia (UPM) Dr Razali Othman berkata, konsep wakaf sudah jelas dibuktikan sebagai sumber dana utama untuk menjana ekonomi namun masih lagi terdapat persepsi negatif dalam kalangan umat Islam yang menganggap sistem itu sebagai ketinggalan zaman.

Katanya, ia adalah antara cabaran yang perlu ditangani supaya pemikiran itu dapat diubah dan konsepnya difahami dengan baik sebagai satu sedekah yang berkekalan.

“Berdasarkan kajian yang dipetik daripada Islamic News dua tahun lalu, terdapat hampir RM1.5 trilion wakaf yang belum diteroka. Sumber contoh paling mudah ialah kita andaikan terdapat 10



**DR Razali**

juta umat Islam dan mereka berwakaf. Isunya sekarang ialah bagaimana untuk mendapatkan RM10 seorang. Dari situ pentingnya sebuah inovasi terhadap konsep wakaf.

“Saya melihat sistem wakaf di Malaysia ini banyak cabaran memandangkan ia adalah sebuah sistem yang saling menyokong. Sistem itu belum lagi mantap seperti di negara lain seperti Indonesia dan Turki,” katanya ketika menyampaikan ceramah di Seminar Filantropi dan Derma Bakti Islam: Pendekatan Korporat Dalam Konsep Wakaf, di Institut Kefahaman Islam Malaysia (IKIM), di sini, semalam.